

Broj: 01/1-23-____ /18
Datum, _____.2018. godine

Na osnovu člana 3. stav 1. tačka d. i člana 10. stav 2. Zakona o komunalnim djelatnostima („Službene novine Zeničko-dobojskog kantona“, broj: 17/08), člana 7. Zakona o korištenju, upravljanju i održavanju zajedničkih dijelova i uređaja zgrade („Službene novine Zeničko-dobojskog kantona“, broj: 4/16) i člana 24. Statuta Općine Kakanj („Službene novine Općine Kakanj“, broj: 4/08), Općinsko vijeće na 23. sjednici održanoj ____ 2018. godine, **d o n i j e l o j e**

O D L U K U
o izmjenama i dopunama prečišćenog teksta Odluke o zagrijavanju stambenog i poslovnog prostora u Kaknju daljinskim grijanjem i Uslova za isporuku i preuzimanje toplotne energije iz daljinskog grijanja

Član 1.

Član 19. prečišćenog teksta Odluke o zagrijavanju stambenog i poslovnog prostora u Kaknju daljinskim grijanjem i Uslova za isporuku i preuzimanje toplotne energije iz daljinskog grijanja („Službene novine Općine Kakanj“ br. 2/2015) mijenja se u cijelosti i glasi:
„Privremeno isključenje za prostor koji je dio energetske cjeline stambene ili stambeno-poslovne zgrade i individualno stambene objekte (kuće), po zahtjevu potrošača i uz odobrenje distributera može se vršiti isključivo u slijedećim slučajevima:

nepredviđenih događaja u prostorijama potrošača uzrokovanih višom silom kao što su (požar, eksplozija, poplava i sl.);
većih radova na održavanju kućnih instalacija;
rekonstrukcije ili proširenja kućnih instalacija;
u izuzetnim slučajevima uz pismenu saglasnost distributera.

Maksimalan period privremenog odustajanja od preuzimanja toplotne energije, za prostore koji su dio energetske cjeline i individualno stambene objekte (kuće), može biti dok traju gore navedeni radovi ili sanacija posljedica a najduže jednu sezonu grijanja.“

Predmetno isključenje obavlja isključivo distributer uz naplatu naknade troškova od potrošača, po cijeni koju odredi Nadzorni odbor na prijedlog uprave.

Član 2.

Član 20. prečišćenog teksta Odluke briše se u cijelosti.

Član 3.

U članu 22. prečišćenog teksta Odluke briše se u cijelosti rečenica:
„Naknada za širenje daljinskog grijanja (taksa) samo u slučaju kada je period privremenog isključenja trajao duže od 2 (dvije) godine“.

Član 4.

Sastavni dio ove Odluke su izmjene i dopune prešišćenog teksta Uslova za isporuku i preuzimanje toplotne energije iz daljinskog grijanja.

Član 5.

Ova Odluka stupa na snagu danom donošenja, a naknadno će se objaviti u „Službenim novinama općine Kakanj“.

**IZMJENE I DOPUNE
prečišćenog teksta Uslova za isporuku i preuzimanje toplotne energije
iz daljinskog grijanja**

Član 1.

Član 44. prečišćenog teksta Uslova za isporuku i preuzimanje toplotne energije iz daljinskog grijanja („Službene novine Općine Kakanj“, broj: 2/2015), mijenja se u cijelosti i glasi:

„Ako prekid distribucije toplotne energije potrošaču traje duže od 20 sati neprekidno, distributer će kod paušalnog obračuna troškova grijanja potrošaču umanjiti račun proporcionalno trajanju prekida isporuke toplotne energije. Distributer ne snosi odgovornost za nastale štete kod potrošača uslijed obustave ili prekida isporuke toplotne energije“.

Član 2.

U članu 52. prečišćenog teksta Uslova brišu se u cijelosti posljednja 2 (dva) stava koji glase:

„Fiksni troškovi za priključni toplotni kapacitet, kod paušalnog obračuna, su obaveza koju potrošač plaća u slučaju privremenog isključenja ili prekida isporuke usluge.

Iznos ovog troška za jednu sezonu grijanja se dobije množenjem:

- Ukupne površine zagrijavanog prostora iskazane u m^2 i
- 30% jedinične cijene istog iskazane u KM/ m^2 “.

U ostalom dijelu član ostaje nepromijenjen.

**PREDSJEDAVAJUĆI
OPĆINSKOG VIJEĆA**
Slaven Katičić

O b r a z l o ž e n j e

Prijedlog za izmjene ovih članova Odluke o zagrijavanju stambenog i poslovnog prostora u Kakanju daljinskim grijanjem i Uslova za isporuku i preuzimanje toplotne energije iz daljinskog grijanja podnosimo na osnovu nedavno donesenih rješenja Konkurencijskog vijeća BiH u gradovima Travnik, Zenica, Sarajevo radi kako se kaže zloupotrebe dominantnog položaja u smislu Zakona o konkurenčiji. Jednu od osnovnih zloupotreba Konkurencijsko vijeće vidi u fakturisanju fiksnih troškova u slučaju kada su potrošači privremeno isključeni sa sistema daljinskog grijanja. Nama najbliži primjer je primjer grada Zenice i JP „Grijanje“ d.o.o. Zenica koji su novčano kažnjeni i kojima je naloženo da usklade svoje interne akte sa Zakonom o konkurenčiji.

Na osnovu člana 25. stav (1) tačka e), člana 42. stav (1) tačka a) i c), člana 48. stav (1) tačka a) i c), a u vezi sa članom 4. stav (1) tačka e) i članom 10. stav (2) tačka d), Zakona o konkurenčiji ("Službeni glasnik BiH", br. 48/05, 76/07 i 80/09), u postupku pokrenutom po Zaključku o pokretanju postupka po službenoj dužnosti, broj: UP-05-26-3-030-2/17 od 30.11.2017. godine, protiv Grada Zenice, Trg Bosne i Hercegovine 6., 72000 Zenica, radi utvrđivanja postojanja zabranjenih konkurenčijskih djelovanja u smislu člana 4. stav (1) tačka e) i Javnog preduzeća "Grijanje" d.o.o. Bilmišće 107, 72000 Zenica, radi utvrđivanja postojanja zloupotrebe dominantnog položaja, u smislu člana 10. stav (2) tačka d) Zakona o konkurenčiji, Konkurencijsko vijeće na 20. (dvadesetoj) sjednici, održanoj dana 28.02.2018. godine, je donijelo Rješenje kojim se izriče novčana kazna Gradu Zenica, Trg Bosne i Hercegovine 6., 72000 Zenica, zbog kršenja odredbi člana 4. stav (1) tačka e) Zakona o konkurenčiji, utvrđenog u tački 1. ovog Rješenja, u visini od 80.727,30 KM (osamdesethiljadasedamstotinadvadesetsedam i 30/100), u smislu člana 48. stav (1) tačka a) Zakona o konkurenčiji, koju je dužna platiti u roku od 15 (petnaest) dana od dana prijema ovog Rješenja. Izriče se novčana kazna Javnom preduzeću "Grijanje" d.o.o. Bilmišće 107, 72000 Zenica, zbog kršenja odredbi iz člana 10. stav (2) tačke d) Zakona o konkurenčiji, utvrđene u tački 5. ovog Rješenja, u visini od 16.830,434 KM (šesnaesthiljadaosamstotinatrideset i 434/100 KM) u skladu sa odredbom člana 48. stav (1) tačka b) Zakona o konkurenčiji, koju je dužan platiti u roku od 15 (petnaest) dana od dana prijema ovog Rješenja.

Ovo Rješenje je objavljeno u „Službenom glasniku BiH“ br. 27/18 od 27.04.2018. godine.

Kako bi izbjegli mogućnost da ista sudbina zadesi i JP „Grijanje“ d.o.o. Kakanj pristupilo se Prijedlogu Izmjene Odluke o zagrijavanju stambenog i poslovnog prostora u Kakanju daljinskim grijanjem i Uslova za isporuku i preuzimanje toplotne energije iz daljinskog grijanja („Službene novine Općine Kakanj“ br. 2/2015) i njenog usklađivanja sa odredbama Zakona o konkurenčiji.

Predlagač: Skupština JP „Grijanje“ d.o.o. Kakanj

Obradivač: JP „Grijanje“ d.o.o. Kakanj